



17 de agosto de 2010. De aqueles pós veñen agora estas lamas. O desmantelamento por parte do goberno Feijóo dos dispositivos do [Voluntariado en Defensa do Monte Galego](#)

iniciado trala catástrofe de 2006, exemplifica a **política suicida**

da Xunta en materia de loita contra o lume. Abandono da prevención, esquecemento da sensibilización e da disuasión, recortes e precarización dos dispositivos de extinción, paralización das UXFOR e privatización encoberta através das SOFOR... Todo adubiado coa censura informativa, a mentira e a manipulación dos datos, conforma o bochornoso espectáculo dun goberno superado polos acontecementos e que non aprendeu ren do pasado, agás para botarlle a culpa ao vento.

LUME E POLÍTICA. Un artigo de Adela Figueroa, ex-presidenta de ADEGA

Galiza volve a arder. E aínda falta setembro, mes no que “secan as fontes e arden os montes”. Para algúns, o exercicio do poder consiste en desmantelar todo o que os gobernos anteriores levaran feito: hai que marcar diferenzas, mesmo suprimindo os acertos. Un claro exemplo foi a disolución do dispositivo do Voluntariado en Defensa do Monte Galego, que se artellara no verán de 2006, polo San Roque. A partir de aquel momento os incendios comezaran a recuar. Non estou a dicir que o Voluntariado fose o responsábel directo nen único da diminución dos lumes, mas si que foi un dos varios elementos que colaboraron, e non o de menos importancia.

Dende ese fatídico agosto de 2006 e até a chegada de Feijóo ao poder, sempre houbo Voluntariado en Defensa do Monte Galego, que se artellaba xa antes do verán, mais que traballaba tamén no inverno en varios [acampamentos](#) : Forcarei, Monforte, Vilagarcía.... A idea de que

apáganse no inverno

os incendios do verán tentou ser unha realidade durante os anos seguintes ao desastre de 2006. Nestes acampamentos realizábanse traballos de Educación Ambiental con estudantes dos colexios de toda Galiza, colaborábase coas Comunidades de Montes na restauración dos ecosistemas degradados polos incendios, e facíase divulgación e sensibilización ambiental contra do lume. As cuadrillas de Voluntarios/as en Defensa do Monte Galego, eran visíbeis nas zonas de risco no rural e nas zonas periurbanas. Fixeron un importante labor de disuasión, de prevención, de axuda e de colaboración cos dispositivos antiincendios. Conformaron equipas de xente que

acabou por se integrar coa poboación e se indentificar co ambiente, implicándose en posteriores procesos ecolóxicos e ambientais. ADEGA tivo un importante papel na organización e mantemento destes dispositivos que fíxonos merecentes do premio ["Arousana do Ano"](#) en 2007.

É um grande erro desprezar a experiencia e a sabedoría adquirida polos predecesores no exercicio do poder. Desmantelando o dispositivo do Voluntariado en Defensa do Monte Galego, a Xunta non está a aforrar cartos, pois os incendios saen imensamente máis caros que a prevención. O labor de implicación social na corresponsabilidade e a custodia do noso entorno é un porceso longo, como todos os procesos de ensino-aprendizaxe, mais é un investimento en futuro. Calquera persoa sensibilizada co medio, e hai moitas neste país, estaría disposta a colaborar coa Xunta na prevención desta lacra social, ecolóxica e económica que son os incendios, independentemente da súa cor política. Só precisan de oportunidades, e o que fixeron precisamente os Sres. Feijóo e Juárez foi quitárllelas. Iso sí, cando os lumes lles estouparon na cara e foi imposíbel seguir agochando dimensión do problema, clamaron pola colaboración da sociedade... e culparon aos "elementos" (tanto meteorolóxicos como incendiarios).

Lamentamos infinitamente a desgraza dos dous rapaces de Fornelos de Montes mortos cando loitaban, integrados no SEAGA, contra o incéndio nesa localidade. Quero enviar as miñas condolenzas aos seus, esperando que non se volten dar as circunstancias que fixeron posíbel tan triste acontecemento. Por iso é importante que teñamos a consciencia de que queimar um monte é um acto criminal que debe ser repudiado pola sociedade e castigado pola xustiza. E que os gobernos deben pór todo da súa parte para loitar contra deles, incluíndo a sensatez de recoñecer e aprender dos erros cometidos.

Adela Figueroa Panisse, membro da Directiva nacional e ex-presidenta de ADEGA